

## Mungu Anazidisha Talanta Zangu

Vema, mtumwa mwema na mwaminifu; ulikuwa mwaminifu kwa machache, nitakuweka juu ya mengi; ingia katika furaha ya bwana wako—

**Mathayo 25:21.**

Mungu ametupatia talanta ili tuzitumie kwa ajili Yake. Humpatia mmoja talanta tano, mwingine mbili na mwingine moja. Hebu yule aliyepewa talanta moja asikusudie kuificha mbali na Mungu. Bwana anajua mahali ilipofichwa. Anajua kuwa haifanyi chochote kwa ajili Yake. Bwana atakapokuja, Atamwuliza Mtumishi Wake, umetumiaje talanta nilizokupatia? Na yule aliyepokea tano na yule aliyepokea mbili wakimwambia kwamba kwa kufanya biashara wamezizidisha talanta zao, Naye atawaambia, “Vema, mtumwa mwema na mwaminifu. Ulikuwa mwaminifu kwa machache, nitakuweka juu ya mengi.... Ingia katika furaha ya Bwana wako.” Ndivyo atakavyomwambia yeye aliyeendeleza talanta moja aliyomkopesha....

Kwa yule aliye na talanta moja tu Ningemwambia, je, unajua kwamba talanta moja, ikitumiwa vizuri na kuendelezwa, italeta kwa Bwana talanta mia moja? Kwa jinsi gani? Unauliza. Itumie karama yako katika uongoaji wa mtu mmoja mwenye uwezo mkubwa kiakili, ambaye anaona kile Mungu alichokwake na vile apaswavyo kuwa kwa Mungu. Mwache ajisogeze karibu na Bwana, na anapokuwa akitoa nuru kwa wengine, atakuwa njia ya kuwaleta watu wengi kwa Mwokozi. Kwa njia ya utumiaji sahihi wa talanta moja roho mia moja zinaweza kuupokea ukweli. Sio wale walio na idadi kubwa ya talanta ambao wanaambiwa “Vyema sana”, bali kwa wale ambao wamezitumia karama zao kwa unyofu na uaminifu kwa ajili ya Bwana....

Kuna kazi kubwa ya kukamilishwa katika ulimwengu wetu na tutatoa hesabu kwa kila mwonzi wa nuru ambayo uliangaza njiani mwetu. Wapatie wengine nuru hiyo, kisha utapokea nuru zaidi ili kuwapatia wengine. Baraka Kuu itawajia wale ambao huzitumia talanta zao vizuri.